

Mid-Day Dogri News

26 Nov. 2025

12:25 hrs.

NC RS Oath

जम्मू-कश्मीर थमां नमें चनोए एन.सी. दे त्रै सांसद स्यालै आले सत्र दे पैहले रोज पैहली दिसम्बर गी राज्यसभा च अपने ओहदे दी संगंध चुक्कंगन। शम्मी ओबेराय- सज्जाद अहमद किचलू ते चौधरी मोहम्मद रमजान होरें गी उपराष्ट्रपति ते राज्यसभा दे चेयरमैन सी.पी. राधाकृष्णन होर ओहदे दी संगंध चुक्कंगन। इन्दे चुना कन्नै तकरीबन पंज बरे मगरा उप्परले सदन च जम्मू-कश्मीर दी नुमायंदगी दी वापसी होई ऐ। जम्मू-कश्मीर थमां राज्यसभा दी 4 सीटें लेई होए दे चुनाएं च नैशनल कांफ्रेंस नै त्रै सीटें पर जित्त हासल कीती ही जिसलै कि बी.जे.पी. नै इक सीट हासल कीती ही- एहदे मेदवार सत शर्मा होरें पैहले गै ओहदे दी संगंध लेई लैती दी ऐ।

<><><><><><>

Samvidhan Diwas JK

समूलचा मुल्ब अज्ज संविधान दिवस मना करदा ऐ जेहदे लेई इस बरे दा विषय सार ऐ- “स्थाड़ा संविधान -स्थाड़ा स्वाभिमान”। उपराज्यपाल मनोज सिन्हा होरें संविधान दिवस दे मौके पर देशवासियें गी बधाई दिती ऐ। जम्मू-कश्मीर च बी इस ध्याड़े गी मते उत्साह कन्नै मनाया जा रदा ऐ। इस सिलसिले च अज्ज बडुलै 11 बजे सम्भनें सरकारी दफ्तरें- कालजें ते होरनें इदारे च संविधान दी प्रस्तावना पढी गेई। एदे इलावा जिला मुख्यालय सतह पर विशेष यात्राएं ते द्रौड़ें दा सरिस्ता कीता जा रदा ऐ- जेहदे च आम लोकें ते टकोहदा करियै नौजवानें गी कन्नै जोड़ेया जा करदा ऐ। इस द्रौड़ गी नां दिता गेदा ऐ “रन फॉर जस्टिस” लिबर्टी- इक्वैलिटी एंड फ्रेटर्निटी। स्कूलें कालजें च इस मौके विशेष सभाएं दा सरिस्ता कीता जा रदा ऐ जिंदे राएं संविधान असैम्बली च महिलायें दे योगदान गी उजागर कीता जाहग। शैहरें च सार्वजनिक थाहरें कंधें पर संविधान दी प्रस्तावना गी दर्शादि चित्र वगैरा बी लाए गेदे न।

<><><><><><>

Prog. Announcement

आकाशवाणी दा क्षेत्रीय समाचार एकांश जम्मू संविधान दिवस-2025 दे मौके पर अज्ज इक विशेष चर्चा प्रसारित करने जा'रदा ऐ जेहदा विशे ऐ "भारती संविधान च नागरिकें दे बुनियादी अधिकार ते कर्तव्य"। हूने किश चिर मगरा दपैहरी साङ्गे 12 बजे एह कार्यक्रम इस्सै चैनल पर प्रसारित कीता जाहग- जेहदे च स्हाड़ी परोहिनयां होङन जम्मू युनिवर्सिटी दे लॉ डिपार्टमेंट च असिस्टेंट प्रोफेसर डॉ. रजनीश खजुरिया जेहड़ी इस विशे पर अपने माहिराना विचार श्रोताएं कन्नै सांझे करङन ते इन्दे कन्नै गल्लबात करङन स्हाड़ियां न्यूज एंकर श्रुति खजूरिया।

<><><><><><>

LG- 26/11

उपराज्यपाल मनोज सिन्हा होरें 26/11 दे मुम्बई आतंकी हमले च शहीद होए दे सब्भनें लोकें गी अज्ज श्रद्धांलि भेंट कीती ऐ। सोशल मीडिया पर इक पोस्ट च उपराज्यपाल होरें आखेया जे मुख्य म्हेशां उनें बहादुर सुरक्षाकर्मियें दा आभारी रौहग- जिनें देसै दी संप्रभुता ते अखंडता लेई बहादुरी कन्नै लड़ाई लड़ी ते सर्वोच्च बलिदान दिता। सिन्हा होरें उन्दी दलेरी ते निस्वार्थ भावना गी चेता करदे होई इस गल्लै पर जोर दिता जे उन्दी विरासत पीढ़ियें गी प्रेरित करदी रौहग ते आतंकवाद खलाफ मुख्य दे संकल्प गी होर मजबूत करोग।

<><><><><><>

CS Digital

मुख्य सचिव अटल डुल्लु होरें पी.एम गति शक्ति पोर्टल उपपर केन्द्र शासत प्रदेश दा पैहला डिजिटल Land Bank दा शुभारम्भ कीता। एह पैहला जंगलात ते वित्त विभागे आसेया भार-मुक्त यानि कोई कनूनी रुकावट-नीजि दावा या होर दुई रुकावट नेंई होयै दे रुप च विकसित होआ ऐ। इस पैहल राएं बक्ख-बक्ख जीमी दे नक्शे तयार कीते जंदे न जेहदे राएं विकास परियोजनाएं दी पंछान कीती जाई सकै। 17 जिले च 462 पारसलें ते 24 सौ हैक्टर शा मते क्षेत्र गी कवर करदे होई इस Land Bank दा उद्देश्य बुनियादी ढांचे दी योजना गी व्यवस्थित करना ते जमीन उपपर नजैज कब्जे गी रोकना ऐ। मुख्य सचिव होरें जिला प्रशासन गी पारसलें दी नियमत निगरानी ते इस प्लेटफार्म दा प्रभावी ढंगा कन्नै इस्तमाल करने दा आग्रह कीता। समारोह च सीनियर अधिकारियें ते DCएं वीडियो कांफ्रेंसिंग राएं हिस्सा लैता।

JK –Govt. Awards

जम्मू-कश्मीर सरकारै 2026 दे स्टेट अवार्ड- जेहड़े गणतंत्र दिवस दे मौके पर दिते जाने न- लेई नामजदगियां मंगियां न। आम प्रशासनिक विभाग आसेया इस बरे जारी इक अधिसूचना मुजब एह अवार्ड बहादुरी- साहित्य- कला- कारीगरी- समाज –सुधार- सार्वजनिक सेवा- लाइफ टाईम एचीवमैन्ट- खेडु- मीडिया- पर्यावरण- उद्योगिक उद्यमता दे क्षेत्र च दिते जाने न। इंदे लेई नामजदगियां समाजी ते खेडु संगठन- गैर-सरकारी संगठन- युनिवर्सिटियां- प्रशासनिक सचिव ते जम्मू-कश्मीर कला संस्कृति ते भाषा अकादमी आसेया भेजियां जाई सकदियां न। एहदे लेई खीरी तरीक 15 दिसम्बर 2025 रखी गेदी ऐ।

<><><><><><>

Film Shooting Resumes

कश्मीर घाटी च फिल्में दी शूटिंग परतियै शुरु होने कन्नै जम्मू-कश्मीर फिल्म उद्योग इक बारी फही हरकत च आई गया ऐ- जेहड़ा पैहलगाम आतंकी हमले दे बाद लोकें अंदर बने दे डर-त्राह दे खत्म होई जाने दी सारत दिंदा ऐ। इनें दिनें श्रीनगर दी मशहूर डल झील पर इक कन्नड़ फिल्म दी शूटिंग चलै करदी ऐ- जेहदे निदेशक ए.आर. विक्काथ न ते महिमा नाम्बिआर ते गणेश एहदे च कम्म करने आहले मुख्ब अदाकार न। फिल्म दे डरैक्टर विक्काथ होरें आखेया जे घाटी च हून कोई डर-त्राह आहला माहौल नैई ऐ ते ओ इत्थें पूरी चाल्ली सुरक्षत मसूस करै करदे न।

<><><><><><>

Tennis Champ.

जम्मू-कश्मीर खेड परिषद- जम्मू-कश्मीर Tennis Koit Association दी सांझ भ्याली कन्नै अज्ज थमां 30 नवम्बर तगर Green Field खेडु मैदान गांधी नगर जम्मू च 42मीं जूनियर Tenni-Koit राष्ट्रीय प्रतियोगिता दी मेजबानी करा रदा ऐ। इस प्रतियोगिता च देशै दे बक्ख-बक्ख इलाके थमां 550 शा मते एथलीट Technical अधिकारी ते Sports Journalists हिस्सा लै रदे न। इक हफ्ते तगर चलने आहली इस प्रतियोगिता च बक्ख-बक्ख इलाके दे खडारी अपनी कला दा प्रदर्शन करगंन।

<><><><><><>